

摘藻堂四庫全書薈要

集部

欽定四庫全書薈要卷二萬五百五十七

集部

明詩綜卷八十四

閨門

翰林院檢討朱彝尊編

靜志居詩話婦人詩集始於顏竣殷淳爰有徐陵李康成玉臺之編蔡省風瑤池之詠代加甄綜韋穀才調集輯閨秀一卷宋元以降選家類不見遺明則鄺疏之彤管遺編張之象之彤管新編田藝衡之詩女史劉之汾之翠樓集俞憲之叔秀集周履靖之宮閨詩選鄭琰之名媛彙編梅鼎祚之女士集青泥蓮花記姚旅之露書潘之恒之亘史趙問奇之古今女史无名子池上客之名媛璣彙竹浦蘇氏之臘脂璣蘭陵鄒氏之紅蕉集江邦申之玉臺文苑方維儀之宮

閨詩史沈宜修之伊人思季嫺之閨秀集其文亦云富矣然青黃雜採真贋交錯近濟南王考功士祿悉從考正為然脂集發几起例有要有倫而予斯編亦稍糾羣書之紕繆焉

郭貞順一首

貞順潮陽周伯玉妻明初師下嶺南指揮俞良輔征諸寨之未服者貞順從伯玉居溪頭寨作詩上之良輔覽詩大喜一寨得全

上俞將軍

將軍開國之武臣早附鳳翼攀龍鱗烟雲慘淡遍九野

半夜捧出扶桑輪前年引兵下南粵眼底羣雄盡流血
馬啼帶得淮河水灑向江南作晴雪潮陽僻在南海濱
十載不斷干戈塵客星移處萬里外天子亦念遐方民
將軍高名邁千古五千健兒猛如虎輕裘緩轡踏地來
不減襄陽晉羊祜此時特奉明主恩金印斗大龜龍紋
大開藩衛制方面期以忠義酬明君宣威布德民大悅
把菜一笠誰敢奪黃犢春耕萬隴雲霓龍夜卧千秋月
去歲壺陽戍守時下車愛民如愛兒壺山蒼蒼壺水碧

父老至今歌詠之欲為將軍紀勲績天家自有如椽筆
願屬壺民歌太平磨厓勒盡韓山石

張紅橋一首

紅橋閩縣人膳部林鴻外室

遺林鴻

一南一北似飄蓬妾意君心恨不同他日歸來也無益
夜臺應少繫書鴻

田娟娟一首

娟娟工部郎木涇元經之室

慰元經

碧玉杯中琥珀光
燈前把勸阮家郎
不須苦憶人間世
萬樹桃花即故鄉

孟淑卿一首

淑卿蘇州人訓導孟澄之女自號荆山居士

徐昌

穀云淑卿詩零落已多其傳者直欲與文姬羽
仙輩爭長顧玄言云荆山居士之論謂作詩
貴脫凡化質閨人不可有鉛粉
氣覽其詩果然魚玄機之亞也

題画

嶺樹盤雲上溪迴路轉斜晚來烟靄合何處問山家

陳懿德一首

懿德長興人移居仁和南康知府陳敏政之女

嫁同縣李昂

景泰甲戌進士

官至右副都御史

顧玄言云夫人

詩集頗富句如深院雪消芳草綠小園風過落梅多情致幽絕足為女郎之秀

閩山道中

行盡山蹊路渺茫幾家茅屋對斜陽引泉竹溜穿厨入

墮粉松花遶舍香
樵徑無人閒卧犢
石田初雨漸分秧
平生頗有山林癖
欲向溪邊結草堂

朱妙端 四首

妙端字仲嫺號靜菴海寧人尚寶卿朱祚女光

澤教諭周濟妻有靜菴集

顧玄言云靜菴蘿落見梅詩可憐不遇知

音客零落殘香對野人或譏其以所配非偶形
諧吟詠于讀其鶴賦云何美人之見獲遂羈絡
于軒墀蒙主人之過愛聊隱迹而栖遲斯可謂
怨而不怒矣詠虞姬云貞魂化作原頭草不逐
東風入漢郊何其

詞義之烈烈也

詩話靜菴詩頗流麗于歸之後移家海鹽
故淑秀集明詩粹明詩妙絕俱作海鹽人

白紵詞

西風蕭蕭天雨霜
館娃宮深更漏長
銀臺絳蠟何煌煌
笙歌勸酒催華觴
美人起舞雪滿堂
清歌宛轉飛雕梁
君王沉醉樂未央
臺前月落天蒼蒼

方維儀云雖乏新奇而句句鏗鏘

客中偶成

異鄉久為客
風雨阻歸程
兩岸數峰碧
孤舟一羽輕
蓬牕殘燭在
烟樹早鴉鳴
坐待東方曙
依稀見海城

周青士云

極似郭良
曉行之作

竹枝詞 二首

西子湖頭賣酒家
春風搖曳酒旗斜
行人沽酒唱歌去
踏碎滿隄山杏花

橫塘秋老藕花殘
兩兩吳姬蕩槳還
驚起鴛鴦不成浴
翩翩飛過白蘋灘

馮銀一首

銀字汝白瓊山人教諭源之女歸同邑唐繼祖

有孝行

詩話汝白讀顏子簞瓢陋巷舍書起而作曰吾
雖居陋巷朝爲命僕以耕則有餘食矣暮爲督
婢而織則有餘衣矣暇與子觀書則有餘樂矣
吾其與顏氏之子同儔哉臨高王同知佐爲志
其墓稱其幾
于知道云

暮春

綠暗紅稀春已深
嬾聽杜宇喚歸音
凋榮何限人間事
獨倚蓬牕數過禽

鄒賽貞

一首

賽貞當塗人贈監察御史謙之女翰林編修濮

韶之母封孺人有士齋集

潘景升云孺人詩文端嚴典雅惜幼之所

習長之所從皆在苜蓿齋中未免涉寒酸氣

詩話士齋女嫁費文憲公其詩甚腐都無林下風致

中秋有懷

銀漢無聲夜氣清
良宵忽感宦游情
東山遙望人千里
想亦停杯對月明

潘氏 二首

氏台州人山東副使潘應昌女貢士裘致中之
妻自號碧天道人有碧天道人存橐

水亭

園亭當水中兩岸蘆花沒夜久人未眠碧水蕩秋月

秋詞

翻翻黃葉落西風月滿池亭秋夜空黃菊酒香人已醉
白蘋江冷渡飛鴻

茅氏一首

氏太倉衛人陸震之母

賣宅

壁有蒼苔甑有塵
家園一旦屬西鄰
傷心畏見門前柳

明日相看是路人

顧玄言云寡婦賣宅之作志尚端嚴

王素娥一首

素娥號檠齋紹興山陰人
歸部吏胡節節死不

嫁

渡錢塘

風微月落早潮平江國新晴喜不勝試看小舟輕似葉

載將山色過西陵

顧玄言云
思朗致新

陸

娟一首

娟華亭人陸德蘊之女馬龍妻

代父送人還新安

津亭楊柳碧毵毵人立東風酒半酣萬點落花舟一葉
載將春色到江南

儲氏

一首

氏泰州人大學士瓘女嫁興化舉人成學

雨後

天桃灼灼倚牕前
春色繽紛帶紫烟
昨夜雨聲來枕上
惜花人醒不曾眠

屈安人 三首

安人華陰人總督漕運右副都御史直之女嫁
參議朝邑韓邦靖封安人有集

詩話安人早慧十齡刺繡聞父訓諸子盡得其解尋令賦詩悉合獲度其詩康德涵序之

登江樓

登高樓兮見西風吹水之潺湲水東去以不回兮客思
歸其何年

送夫入覲

君往燕山去棄妾雒水旁雒水向東流妾魂隨飛揚丈
夫輕離別壯志在四方努力事明主肯為兒女傷君有
雙親老垂白坐高堂晨昏妾定省喜懼君自量珍重復
珍重丁寧須記將既為遠別去飲余手中觴莫辭手中

觴為君整行裝陽關歌欲斷柳條絲更長

述懷

自注是歲弟之燕妹歸
商親在華下余居渭北

浙浙北風起蕭蕭木葉稀
寒花愁更發鴻鴈獨南飛
秋入商山裏天長渭水西
思歸歸未得悵望淚沾衣

馬間卿一首

間卿字芷居上元人少卿陳沂繼室封安人有
芷居集

苦雨

終日雨翻盆愁人欲斷魂嶺雲生屋角野水沒籬根楊
葉藏深徑梨花靜掩門聲聲偏入耳寂寞自朝昏

黃安人二首

安人遂寧人黃簡肅珂之女修撰楊慎之繼室

封安人

王元美云夫人寄外之作用修谷和皆不及也陳卧子云其調雖別自是成

章高寓公云夫人是詩才情殊勝特嫌韻重陽字首句不如以相字易之郎士元送李敖詩

云莫信潮湘書不到年年

秋雁過巴東亦有本也

詩話美人娟娟隔秋水杜子美句也其雨怨朝陽阮嗣宗句也黃魯直寄蕓和仲詩用之曰美

人美人隔秋水其雨其雨怨朝陽楊夫人復用
魯直語寄用修正陸平原所云襲故彌新者

寄夫

鴈飛曾不到衡陽錦字何由寄永昌
三春花柳妾薄命六詔風烟君斷腸
曰歸曰歸愁歲暮其雨其雨怨朝陽
相憐空有刀環約何日金雞下夜郎

方維儀云不纖
不庸格老氣逸

寄升菴

嬾把音書寄日邊
別離經歲又經年
郎君自是無歸計
何處青山不杜鵑

李玉英 一首

玉英錦衣衛人

詩話正德中錦衣衛千戶順天李雄西征陣沒遺孤五人子二曰承祖曰亞奴女三曰桂英曰玉英曰桃英諸子皆前妻所產惟亞奴後妻焦氏生焦欲圖親兒繼襲雄死令承祖往戰場尋父骸骨覲其陷于非命而承祖竟抱骨以歸焦乃鳩死承祖支解而埋之又以桂英鬻豪家為婢玉英頗知典籍年十六伶仃窮迫作送春詩云云又作別燕詩云新巢泥滿舊巢歌泥滿疎簾欲掩遲愁對呢喃終一別畫堂依舊主人非焦指詩詞謂有外通等情俾舅焦榕執送錦衣衛誣以姦淫不孝擬凌遲嘉靖四年夏差太監審錄罪囚凡有事枉人寬許行陳奏于是玉英

具本託其妹桃英齋奏訟冤疏畧云臣年十二
遇皇上嗣位通選才人府尹以臣應選禮部憫
臣孤弱未諳侍御發臣寧家臣年十六伶仃無
倚是以濫形吟詠感諸身心寄諸筆札蓋有不
得已而為言者奈何母恩雖廣勿察臣求但玩
詩詞以為外通拿送錦衣衛本官誣臣姦淫不
孝擬劓罪臣在獄日久有款臣孤弱而與不良
之心者臣撫膺大慟獄中莫不驚惶臣素不才
鄰里何無糾舉乃以數句之詩尋風捉影陷臣
死罪臣之死固無憾十歲之弟毒藥鵠死肢解
埋棄果何罪乎臣母之罪臣不敢言凱風有詩
臣當自責陛下俯察臣情將臣詩句付有司委
勘有無淫姦實情推詳臣母之心盡在不言之
表則臣亡父母之靈亦可慰于地下矣有旨命
三法司會勘焦氏論斬王英著錦衣衛選良才
作配焉按王英二詩本無闕涉而緹帥乃坐以

極刑由是推之寬
獄難以悉數矣

送春

柴門寂寂鎖殘春
滿地榆錢不療貧
雲鬢霞裳伴泥土
野花何似一愁人

端淑卿

一首

淑卿當塗人教諭端廷弼女儒官芮儒之妻有

綠牕詩稿

章元禮云淑卿詩旨
醇而節和風流有致

隋柳

煬帝宮中柳凋零幾度秋蟬聲悲故國鶯語怨荒丘行
殿基仍在空江水自流行人休折盡春日更生愁

斗孃一首

斗孃松江女子嫁姚生

詩話斗孃送夫之
詩見沈津吏隱錄

送夫

遠逐風塵路遺書滿目愁思君不成寐河畔看牽牛
沈潤

卿云語
意清雅

毛鈺龍一首

鈺龍麻城人雲南按察僉事鳳韶之女嫁少保
劉天和孫守蒙夫死誓不踰閭鄉人稱曰文貞

夫人

詩話節婦奉姑樓居不廢吟詠年七十九目無
見猶使甥輩讀之句如桃花暮雨烟中閣燕子
春風月下樓詩句怕題新節序淚
痕多染舊衣裳讀之哀動頑豔

鏡

樣出秦宮製團團寶月迴虛空開物象心迹遠塵埃影

覆香羅帕光生碧玉臺繡囊鴛鳥竝珍重嫁時裁

于太夫人劉氏一首

氏穀城人嫁府同知于玳文定公慎行母也

故城

暮雲深鎖故城春綠樹蒼烟舊白蘋昔日高樓雙燕子
定巢無處往來頻

楊文儷 三首

文儷仁和人工部員外應獬女餘姚孫陞繼室

封夫人詩附見家集

詩話孫文恪初娶于韓後娶于楊諸子登進士
榜者四人太保吏部尚書清簡公鑑文中禮部
尚書鉉文和太僕卿綜文秉兵部尚書鑣文融
皆楊夫人教之示文融詩云何待三遷教傳經
有父兄蓋謙辭也夫人精帖括斷決不爽相傳
文融會試後錄其文呈母夫人笑曰淡墨雖書
第一未免齟筆似魚非文之絕品
也或言夫人有髯年過百齡云

秋日懷親

玉露沾花濕金風入幕涼
天連秋水碧山帶晚烟蒼
撫景嗟時序懷親憶故鄉
倚闌凝佇久心逐鴈南翔

采蓮女

邪溪采蓮女日出蕩輕橈慣識溪中路歌聲入画橋

聞徵瓦氏兵至

傳聞瓦氏勇超羣萬里徵來淨寇氛多少材官屯海畔

策勲翻仗女將軍

顧氏一首

氏崑山人顧茂儉之妹皇甫子循之甥嫁孫僉

事為婦

何元朗云春日一詩
可置玉臺新詠中

春日

春雨過春城
春庭春草生
春閨動春思
春樹滿春鶯

鄧氏一首

氏睂山人訓導
先健女適敘州戶部郎金寬

寄外

鎮日多愁屢廢餐
閉門獨坐遣應難
庭前別我春猶在
月下懷君春又殘
萬點落花誰著眼
一聲飛鴈獨凭闌
夢回湘簟無消息
更啓前書仔細看

王虞鳳一首

虞鳳字儀卿侯官人有罷繡吟年十七卒

春閨

濃陰柳色罩牕紗
風送鑪烟一縷斜
庭草黃昏隨意綠
子規啼上木蘭花

姜氏一首

氏新建人廣西右布政使忻嘉靖乙丑進士女孫也嫁

諸生丁立祺

寄文學山居

何必入山深居然似漢陰
雨殘雲在竹野曠日平林
負郭多幽事為農長道心
芸牕開卷罷多是聽鳴琴

桑貞白 二首

貞白號月牕嘉興人處士
周履靖繼室有香奩
詩草

詩話周逸之處士作詩不暇持擇宜其閨人亦然然紙閣蘆簾倡予和女偕隱太平之時亦樂

已事

寄遠

日暮登樓強自歌
陌頭楊柳望中多
思君書劒天涯客
三月春光有幾何

春日即事

雨晴春暖百花香
戲蝶游蜂各自忙
也擬東郊踏青去
門前流水又斜陽

董少玉

二首

少玉麻城周宏禴繼室有集

戚雲雁云少玉詩
居然唐調
王元

美云少玉詩清潤婉秀往往發於情而止於義
有不盡為閨閣所束者方維儀云夫人詩詞

均有

韻致

憶別 二首

憶別河橋柳青青送馬啼妾心與羌笛無日不遼西
驛路花將發離亭柳漫垂凭闌無一事日日數歸期

屠瑤瑟 一首

瑤瑟字湘靈鄞人禮部隆女年二十而夭

子夜歌

子夜夜轉長簾前月華吐只解歌調工誰識歌心苦

沈七襄一首

七襄宣城人修撰懋學女嫁屠隆子

自君之出矣

自君之出矣孤月鑒虛牖思君如飛花隨風不回首

袁彤芳一首

彤芳字履貞吳縣人參政年女自稱廣寒仙客

九日

玉露泣秋草金風凋晚蕖白衣三徑少黃菊一籬疎病
減登高興愁無寄遠書遙知二三子相向正愁余

王鳳嫻 一首

鳳嫻松江華亭人解元獻吉之姊知宜春縣張

本嘉

萬歷乙未進士

之妻有焚餘草

空閨

壁網蛛絲鏡網塵花鈿委地不知春傷心怕見呢喃燕
猶向雕梁覓主人

陸卿子五首

卿子長洲人尚寶卿師道之女處士趙宦光之
妻夫婦偕隱寒山有雲卧閣考槃玄芝諸集

相逢行

白馬驕青雲金鞭拂紅霧相逢不問名各自東西路

擬陶

閒居寡世用性本忘華簪淶水盈方塘清風來茂林弱
魴戲漣漪野鳥鳴好音日夕時雨來白雲彌高岑庭草

滌餘滋原野
藹飛霖開顏散
遙念濁酒聊自斟

陳卧子云不促

薄

擬李白古風

重陰翳白日
陽和轉淒薄
霰雪何紛揉
草木盡零落
長風終夜厲
棲鳥將焉託
游子敝貂裘
居人羨藜藿
所以商山翁
高舉往巖壑

贈毗陵安美人

去年花發毗陵道
美人何處拾瑤草
今年草綠姑蘇臺

美人此時花下來風吹羅袂香不定流波蕩漾光徘徊
不逐行雲作飛雨夢裏鉛華學神女坐久烟霞拂袂生
回眸愁向空中舉水遠山長不見君空聞樹上黃鸝語

山居即事

披榛越宿莽背郭隱花蹊月靜妖狐泣松深怪鳥啼秋
山雲照戶春澗水穿堤飛作千尋瀑家家引灌畦

徐媛一首

媛字小淑長洲人范副使允臨之妻有絡緯吟

姚園客云小叔詩文與陸卿子齊
名然徐以綺麗勝才情稍遜于陸

別曹孃

木落西風萬壑幽
忍將離思為君留
碧雞關外淒涼月
偏照蠻雲夜夜秋

文氏一首

氏邠州三水人
長沙通判在中之女
嫁葛氏早寡
守節力學有君子亭集

詩話節婦為光祿太青之姊
寡居作九騷以見志
九騷者一曰感往昔二曰懷湘江三曰望洛

陽四曰矢柏舟五曰愀離幃六曰傷落花七曰
臨雲歎八曰待月愁九曰撫玉鏡其辭有云覩
扶光之如箭兮哀歲月其難追拾朱英而太息
兮時不再來悲朱顏其易改兮唯寸心之不衰
辭義俱雅有
古人之則

悼懷

青青山上松年華不可考灼灼園中花顏色不常好五
月鳴蜩至八月蝴蝶老感物有盛衰豈忍歸腐草

薄少君

一首

少君太倉州人秀才沈承妻

哭夫

水次鱗居接葦蕭賣魚爭米晚來囂河梁日落行人少
猶望君歸過板橋

姚氏一首

氏嘉興人自稱青峨居士秀水范應宮之妻有
玉鴛閣遺稿

詩話青峨居士詩屠緯真賞其清華流利陳仲
醇尤稱之謂肝腸如雪能吟柳絮之詞志節凌
霜直擬木蘭之操筆牀茶竈不巾櫛閉戶潛夫
寶軸牙籤少鬢髯下帷董子及其卒橐砧哭之

慟刊其遺詩及已哀悼
倡隨之作傳之鄉里焉

竹枝詞

卓女家臨錦水濱
酒旗斜挂樹頭新
當壚不獨燒春美
便汲寒漿也醉人


范壺貞 一首

壺貞字淑英一字蓉裳
吳縣人嫁吳氏有胡繩
集

烟雨樓圖

烟嵐無限雨中情
遠近樓臺一望平
吳苑草荒麋鹿走
越江春盡鷓鴣鳴
長隄柳樹迷春渚
白水菰莢繞郡城
最是晚來新月下
萬家燈火隔湖明

明詩綜卷八十四



總校官庶吉士 臣 張能照

校對官檢討 臣 蕭九成

謄錄監生 臣 李 本

欽定四庫全書薈要

集部

明詩綜卷八十

五至
七

詳校官編修臣汪鏞



欽定四庫全書薈要卷二萬五百五十八

集部

明詩綜卷八十五

閨門

翰林院檢討朱彝尊編

黃幼藻 一首

幼藻字漢薦莆田人蘇州府通判議之女林儀

部啓昌之婦有柳絮編

姚園客云幼藻麗才雅藻何減玉臺年未四十

而卒臨終猶誦殘燈無
鋏影憧憧之句可悲也

題明妃出塞圖

天外邊風掩面沙
舉頭何處是中華
早知身被丹青誤
但嫁巫山百姓家

梅生一首

生姓梅氏麻城士子周世邁伯玉妻

詩話生有逸才兼工古文辭南昌王于一向予
稱之其夫周伯玉赴試省闈生賦落葉小詩寄
之伯玉省詩悽愴不入鎖院而返足以見伉儷
之重矣傳聞生有外行未免蘭形棘心曾填小
曲寄情人云假若是淚珠兒穿得起拚剪下一
股青絲穿一穿寄把你于一謂古之喻淚者曰
沱若曰連如曰流泉曰垂露曰連絲曰玉箸曰
綆縻曰鉛水曰日南珠未有道及此者于一好

劇譚譚必傾座斯言稍過綫
不能穿淚珠本香山句爾

寄外

落葉滿庭階秋風吹復起遙憶別離人寂寞何堪此

馬氏一首

氏虎關將家婦有香魂集

詩話莆田宋比玉得馬氏詩集于荒邨老屋中
見芳草無言路不明之句為之擊節錄而傳之

秋閨夢戍詩

夫重封侯愛妾輕漫歌珀枕戀寒更夢回遠戍相尋處

芳草無言路不明

沈紉蘭一首

紉蘭字閒靚嘉興人參政黃承昊妻有效顰集

秣陵道中風雨

剔盡寒燈風動幃
長途況是客單衣
無端燕子磯頭雨
一舫隨人到處飛

吳令則一首

令則桐城人諭德應賓長女嫁生員何應瓊玉

之

憶玉之

春來草色想河關
遠道綿綿不可攀
翻恨白雲飛去疾
夕陽千里露童山

吳令儀一首

令儀字棣倩
令則之妹
兵部侍郎方孔炤夫人
夜

新月不來燈自明
江天獨夜夢頻驚
長年自是無歸思

未必風波不可行

方孟式

三首

孟式字如耀桐城人大理卿大鎮之女嫁山東
布政使張秉文濟南城潰同其夫殉節贈一品
夫人有紉蘭集

寄任夫人

可怪睽違日相思幾換年故園芳草合南國美人偏生
死交難見悲歡意莫宣祇應三五夜明月共君圓

秋興

西風傷往事笑此客中身
葉落蒼烟斷花開黃菊新
天涯蓬鬢短邊徼羽書頻
蟋蟀知秋意階前鳴向人

憶舊

一別江潭月幾圓
相憐人面不如前
依稀舊日尋芳地
秋雨梧桐十二年

方維儀

六首

維儀桐城人亦大理卿大鎮之女適姚孫祭再

期而天遂請大歸守志有清芬閣集

詩話龍眠閣多才方吳二門稱盛夫人才尤傑出其詩一流鉛華歸于質直以文史當纖絳尚論古今女士之作編為宮閣詩史分正邪二集主于昭明彤管刊落淫哇覽者尚其志焉集中句若白日不相照何況他人心高樓秋雨時事異時昔何其辭之近乎孟貞曜也

死別離

昔聞生別離不言死別離無論生與死我獨身當之北風吹枯桑日夜為我悲上視滄浪天下無黃口兒人生不如死父母泣相持黃鳥各東西秋草亦參差予生何

所為死亦何所辭白日有如此我心徒自知

傷懷

長年依父母中懷多感傷奄忽髮將變空室獨彷徨此
生何蹇劣事事安可詳十七喪其夫十八孤女殤舊居
在東郭新柳暗河梁蕭條下霜雪臺閣起荒涼人世何
不齊天命何不常孤身當自慰且免摧肝腸鷓鴣栖一
枝故巢安可忘

出塞

辭家萬里戍關路
隔風烟賦重無餘餉
邊荒不種田
小兵知有死
貪吏尚求錢
倚賴君王福
何時唱凱旋

獨歸故閣思母太恭人

故里何須問干戈
擾不休家貧空作計
賦重轉添愁
遠樹蒼山古
荒田白水秋
蕭條離膝下
欲望淚先流

旅秋聞寇

蟋蟀吟秋戶
涼風起暮山
衰年逢世亂
故國幾時還
盜賊侵南甸
軍書下北關
生民塗炭盡
積血染刀環

楚江懷吳妹茂松閣

空林隕葉暮鳥啼雲水迢迢隔皖谿
夜發蒼梧寒夢遠
楚天明月照樓西

方維則一首

維則大理卿大鉉之女嫁生員吳紹忠有茂松

閣集

詩話方氏三節一為孟式同夫殉國一為維儀
十七而寡壽八十有四一為維則十六而寡壽
亦八十有四百圭無玷苦
節可貞足以昭諸管彤矣

題竹

小院何空寂相依獨此君
雪深愁易折風急不堪聞
白石移花影青苔擁籀文
樓頭明月上空翠落紛紛

姚淑人一首

淑人上虞姚克俊女餘姚黃尊素配

詩話淑人年十六歸忠端當公入為御史與楊
左魏李諸公早夜相過語及羣小陰謀輒形之
歎息或至泣下賓退淑人進曰公等不能先事
綢繆涕泣何益公既被逮淑人每夜祈死北辰
之下願以身代逆奄就誅賜章服三品教其子
宗義為復社領袖南國諸生顧杲等公許閣黨

阮大鍼宗義名居第三大鍼後柄用中旨遠治叔人喟然曰豈意章妻滂母萃吾一身山陰劉公宗周常熟瞿公式耜皆目之曰女師詠扇之作託物寓意不審關西惠元孺輩曾見之否

詠蒲扇

世間物性初無定百鍊剛成繞指柔何似萑蒲經織後能將九夏變三秋

沈宜修 二首

宜修字宛君吳江人山東副使琬之女工部郎中葉紹袁之妻有鸚吹集

感秋

月向中天迴

一作小

人驚秋暮悲玄霜初落後

一作候

客夢

未歸時縹緲三秋鴈蕭條兩鬢絲空餘舊簫管愁對月
明吹

仲春寄表妹張倩倩

湖外青山別路長
沉吟舊事總堪傷
故園明月門前柳
回首春風各斷腸

商景蘭

三首

景蘭字靖生會稽人吏部尚書周祚女祁公彪
佳之配

詩話祁商作配鄉里有金童玉女之目伉儷相
重未嘗有妾媵也公懷沙日夫人年僅四十有
二教其二子理孫班孫三女德淵德瓊德萱及
子婦張德蕙朱德蓉葡萄之樹芍藥之花題詠
幾遍經梅市者望
若十二瑤臺焉

送別黃皆令

徵調起驪歌悲風繞坐發人生百歲中強半苦離別念
君客會稽釜不因人熱茲唱歸去辭珮環攜皎月執觴

指河梁愁腸九回折流雲思故島鼯鼠懷故穴帆檣日以遠山川日以越同調自此分誰當和白雪竚立望滄浪憂來不可絕

關山月

秋月開金鏡浮雲散碧空風吹榆戍北露濕柳城東影滿驚門鵲光沉起塞鴻秦關今夜色應與漢宮同

悼亡

公自垂千古吾猶戀一生君臣原大節兒女亦人情折

檻生前事遺碑死後名存亡雖異路貞白本相成

項蘭貞一首

蘭貞字孟晚秀水人貢生黃卯錫之妻有裁雲
月露二草

送外赴試

柳陰輕綰木蘭舟杯酒殷勤動別愁此去但看江上月
清光猶照故園樓

顧若璞一首

若璞字和知錢塘人副使黃汝亨子茂梧之妻
有卧月軒橐

宮詞

垂柳千條拂御墀涼風初到影蛾池銀箏玉笛花前奏
不唱班姬團扇辭

張倩倩

一首

倩倩吳江人沈秀才自徵之妻

憶舊

故人別後杳沉沉。獨上高樓水國陰。鴻鴈不傳千里

一作

書底恨天涯流落到如今

沈憲英 一首

憲英字惠如一字蘭友吳江人沈自炳長女

悼宛君姑

樓上春深乳燕來。半簾花影自徘徊。子規聲裏黃昏月
叫斷東風夢不回

葉紈紈 四首

紉紉字昭齊吳江人葉紹素之女歸素氏有芳

雪軒遺藁

暮春赴嶺西道中作

二首

故園別後正春殘陌上鶯花帶淚看何處鄉情最悽切
孤舟日暮泊嚴灘

烟樹重重失故鄉雲山極目恨偏長不知何日是歸日
杜宇聲聲最斷腸

秋日偶題

一番搖落一番嗟
咫尺天涯夢裏家
莫道秋來不憔悴
滿庭都是斷腸花

哭妹

牕花寂寂蕊初寒
誰向簾前握手看
風景不知人有恨
月明依舊畫闌干

葉小鸞 二首

小鸞字瓊章一字瑤期吳江人
紹袁季女未嫁而夭有疎香閣遺集

已巳春哭沈六舅母墓下

十載恩難報重泉哭不聞
年年春草綠腸斷一孤墳

哭姊

雲散遙天鎖碧岑
人間無路月沉沉
可憐寒食梨花夜
依舊春風小院深

祁德淵 一首

德淵都御史山陰祁彪佳女嫁姜廷梧桐音

送黃皆令

西風江上鴈初鳴
水落寒塘一櫂輕
遶徑黃花歸故里
滿堤紅葉送秋聲
片帆南浦離愁結
古道河梁別思生
此去長塗霜露肅
何時雙鯉報柴荆

張德蕙

一首

德蕙字楚纓
山陰人
諭德元怵之孫
嫁祁公子
理孫奕慶

中秋

秋氣中天淨
愁人獨夜看
停橈江愈闊
却扇月初寒
霜

入桐陰薄風飄桂影殘扣舷情未已露濕綺羅單

朱德蓉 二首

德蓉字趙璧山陰人太師燮元之孫嫁祁公子

班孫奕喜

送黃皆令

青青楊柳枝飄搖大道旁大道多悲風游子瞻故鄉執
杯送行客淚下沾衣裳憶昔弭遠櫂明月浮景光壺觴
極勝引歌舞開華堂好鳥得其侶舉翼齊翱翔膠漆兩

不解金石安可方分袂起倉卒永夜生顛傷吳山何渺
渺越水亦茫茫芙蓉被秋渚采采有餘芳願言贈所思
曰歸紉為裳

上巳

桃花新水浣春衣舊日蘭亭到亦稀斷岸羽觴晴日暖
遠山橫笛暮雲飛沙棠舟近江鷗起玳瑁梁空海燕歸
尚有采蘋思未定不堪月色上羅幃

黃修娟 一首

修娟字媚清仁和人參議汝亨女

邨居即事

寂寂邨居晚迢迢旅鴈稀
煙花迷曲徑山月澹清輝
黃菊經霜淨秋萼帶雨肥
夜深寒漏徹漁火逐星歸

項珮二首

珮字吹聆秀水人處士吳統持之室有藕花樓
詩稿

詩話吳處士巨手有大宅在北郭之秋涇得吹
聆為嘉耦琴瑟靜好詩篇酬和甚樂也遭亂家

破轉徙無定跡糠粃不飽然未嘗聞交謫之言
所題卅齋即秋涇故居取方廣胸前字以為曲
闌鄉人題詠者紛紛惟吹聆詩俱從梵夾中出
極其熨帖或疑卅字韻書不收然三點成卅猶
有想卅即伊字苑
舍人咸詩可據也

夫子書屋落成闌干皆用卅字遂名曰卅齋屬賦
四十字

夫子愛奇字迴闌繚繞之一時齊作卅三點不成卅樹
色春浮竝齋居繡佛宜定知人載酒送喜有蜀尼

社日

過雨春泥白斜飛燕尾纖恰停鍼綫坐自起為鈎簾

翁桓一首

桓字少君錢塘人處士胡介妻

重過西湖

風風雨雨鳥空啼草綠山腰水滿隄
畫閣已傾歌舞散
十年重到六橋西

姚媯俞一首

媯俞字靈修長洲人嫁嘉定侯演有再生餘事

冬日

坐擁烏皮倚隱囊，且翻梵夾靜焚香。
淒淒庭院悲風急，漠漠江天朔鴈翔。
一段旅懷還磊落，百年心事付蒼茫。
登樓望遠迷鄉樹，又見寒鴉送夕陽。

章有渭二首

有渭字玉璜，華亭人。嫁嘉定侯泓，有燕喜樓草
舟行即事

曉霧迷離彩鷁輕，櫂歌徐動見新晴。
臨湍鷺子亭亭立，

夾岸蒲花漫漫生遙指小山遮塔影忽經深樹出鐘聲
晚涼不覺羅衣薄自愛澄湖片月明

春感

舞蝶莊生夢啼鵑蜀帝魂紫芝逢勝友芳草想王孫小
閣聞雞唱閒庭聽鳥喧曉烟迷麥隴春霧鎖柴門魚戲
青萍動風吹碧葉翻綵毫題玉柱綠蟻引金尊乍摘歲
華草長依翡翠軒避秦無絕境何必問花源

盛韞貞

四首

韞貞字靜維華亭人

邨居雜感

三首

自我來茲地重門曉夜扃蕭條門外柳幾度向人青
采蕨懷商土占時望歲星但能安病骨不必問池亭

烽火吳關遠烟花谷水明孤墳應宿草白髮隔重城
遺行書難就玄言較未成愁心託幽夢茲夕倍縱橫

蓬徑無人迹春厨斷暮烟稻粱謀自拙僕隸義相捐
薄俗終難入幽棲性自便尺書兼斗粟慙媿主人賢

寄兄

一自雙親盡鄉園不忍旋七年三見面稚子漸齊肩夢
斷燕山月春歸海樹烟書來能念我三復鵲鷦篇

姚叔一首

淑字仲淑金陵人庶吉士達州李長祥納為繼
室有鍾山秀才海棠居集

寄研齋太史

年年歎離別此別何時休樓頭望不見從今不上樓無

錢買鯉魚君書何處求

倪仁吉 二首

仁吉字心惠浦江人進士仁楨之女

宮意圖

調入蒼梧斑竹枝瀟湘渺渺水雲思聽來記得華清夜
疎雨銀缸獨坐時

彈琴

梨花小院午風輕謾理冰絲入太清一片梧桐心未死

至今猶發斷腸聲

錢敬淑 一首

敬淑字師令江寧人文學談允謙之妻

泊浦子口

殘年孤櫂泊近浦
驗歸程雪圃芹牙白
江醪竹葉清夕陽
新別路衰草古離情
隔岸寒山色含悽望舊京

湯文玉 一首

文玉 訣

司吾春游詩

山雨初晴洗佛螺
春風處處揭青莎
采香不倦溪邊路
多少飛紅趁襪羅

周淑禧一首

淑禧江陰人周榮公第三女

詩話至元斥賣廣濟庫故書有采畫本草一部
近吳中趙凡夫子婦文俶端容設色畫本草曲
臻其妙江陰周榮公二女淑祐淑禧臨之亦成
絕品淑禧寫大士像一十六幅陳仲醇謂其十指
放光直造虛楞伽吳道子筆墨之外今文
淑真蹟尚存周氏姊妹花草罕有見者

杜康廟

酺有新糟醖有醪杜康橋上客題詩最憐苦相身為女
千載曾無儀狄祠

詩話杜康遺冢在江陰縣城南土人於橋下建祠以劉伶配之季給事科草募疏云詩傳雅詠先歌既醉之章書有誥辭特謹德將之訓溯麴蘖流傳既遠而古今風味攸同酒星在天醴泉出地舟中之斛三百市上之價十千爰有飲中八仙竹林七子或沉或酒孰聖孰賢緬懷作醴之功豈止忘憂之具今杜氏遺橋尚在而劉家故巷猶存開歲久而年深為風侵而雨剝茲欲豐碑特樹祠屋重新賴一時共濟以落成庶千載相傳為勝事文頗流利然不若淑禧一絕之新警也

紀映淮 二首

映淮字阿男金陵人嫁莒州杜氏早寡守節終

絕句

杏花一孤邨流水數間屋夕陽不見人牯牛麥中宿

秦淮柳枝

栖鴉流水點秋光愛此蕭疎樹幾行不與行人綰離別
賦成謝女雪飛香

謝五孃 二首

五孃萬歷中湖州女子有讀月居詩

小園即事

翠竹青梧手自栽
芙蓉未秀菊先開
小軒睡起日卓午
黃葉滿庭山雨來

感懷

四面簾垂碧玉鈎
重重深院鎖春愁
天涯行客無歸信
花落東風嬾下樓

曹壽奴三首

壽奴小字山姑崇禎間吳興女子有觀靜齋橐

詩話壽奴詩頗有林下風致

贈姊一篇其源出於楊方

贈伯姊

草有並蒂花木有連理枝果有合歡核豆有同根其魚
或比目游鳥亦比翼隨同功繭作綿合卷玉為卮我與
子姊妹願得不相離出必同車輪居必聯屋楮見月每
共拜弄珠定雙嬉子妝我掠鬢子盥我捧匜我衣禱子
砧子濯汙我私機張我續織鏡聽子兼持子褰我衾裯

我舖子粥糜寒輒擁子背暑還扇我肌子女迭相抱帷
帳恒竝施生從比肩人沒以百歲期

夫君北行以菩提數珠留贈

百八菩提子紅絲貫小纓無眠他夜月留記遠鐘聲

寄外

去作西湖十日期經年猶滯謝公池別來夜夜雙行淚
只有珊瑚舊枕知

李因一首

因字是菴會稽人

一云杭州人

光祿卿葛徵奇之妾

有竹笑軒吟草續豪

詩話是菴善畫花竹之天斜禽鳥之跳躑具有生動之趣刻沉香為像以奉白陽山人詩其餘事爾然無鉛粉之飾

郊居用松陵集韻

避世牆東住牽船岸上居
雨分三徑竹晴曝一牀書
上坂驅黃犢臨淵網白魚
衡門榛草遍長者莫停車

黃媛貞

四首

媛貞字皆德秀水人先世父貴陽守副室有卧

雲齋詩集

俞右吉云亡友黃鼎平立二妹一字皆德一字皆令均有才名皆德為貴

陽朱太守房老深自韜晦世徒盛傳皆令之詩
画然皆令青綾步障時時載筆朱門微嫌近風
塵之色不若皆德
之水雪淨聰明也

丁卯冬十二月留別妹皆令

北風悽以栗不忍吹羅襟高雲語征鳥離思兩難沉
令我遠庭闈與子分芳袞寧忘攜手好所以傷我心
一言一回顧別淚垂不禁但得頻寄書毋使相望深

聽雨

長夜一燈炮獨愁誰與言
牕前幾點雨井上芭蕉翻

山邨

春山春水碧依依
草屋風輕燕子飛行到半坡
亭小住野雲何事亦來歸

貴陽解中

天涯二月早芳菲
官舍何曾遠翠微
如此溪山堪累月
杜鵑猶道不如歸

陸氏一首

氏華亭夏考功允彝侍妾

追悼

錦瑟蒼涼憶舊蹤
芳年行樂太恩恩
濃香簾幕圖書靜
明月樓臺笑語通
人竝玉壺丘壑裏
才分采筆黛螺中
祇餘華表魂歸去
夜夜星辰夜夜風

徐簡簡三首

簡簡字文漪嘉興人休寧吳璵小妻有珮蘭閣

草夢居集

詩話文淵緣情有餘風
格未老然亦閨中之秀

宮詞 二首

沉香亭子玉勾欄
遍植名花按月看
第一莫栽紅芍藥
此花開日定春殘

庭院沉沉盡日扃
自將書法學蘭亭
中官領得芙蓉粉
催入長春寫御屏

寄懷

夾岸垂楊卷落花春風咫尺是天涯重門深鎖樓中燕
獨有王孫不在家

江娥一首

娥宗室來鯤侍兒年十三能詩

戊戌除夕守歲和王孫作

仙茆筆秃硯成冰守歲無聊寢復興柏葉酒香餅已罄
小窻留得隔年燈

朱大韶婢一首

題壁

無端割愛出深閨
猶勝前人換馬時
他日相逢莫惆悵
春風吹盡道旁枝

詩話華亭朱吉士大韶嘉靖丁未進士性好藏書尤愛宋時鏤板訪得吳門舊姓有宋槧袁宏後漢紀係陸放翁劉涓溪謝疊山三君手評飾以古錦玉簾遂以一美婢易之蓋非此不能得也婢臨行時題詩於壁吉士見詩悅惜未幾捐館予聞之李高士延昱云

明詩綜卷八十五

欽定四庫全書蒼要卷二萬五百五十九

集部

明詩綜卷八十六

中涓

翰林院檢討朱彝尊編

靜志居詩話明制設內書堂以教小內侍用史官四員主之從學者約四十人其後撥入讀書者多至三百人所以教之者有方矣而三百年來此輩善詩文者蓋寡予為搜訪僅得六人焉此外若楊友呂憲戴義李學輩雖間有詩句流傳多不成章雖欲廣之而未得也

龔

輦

二首

輦字中道南昌人弘治中為內官監左丞有沖

虛集

俞汝成云左丞雅事文墨兼尚理學沖虛一集所謂空谷之音

贈顧潘

與君少小定交游今日相逢兩鬢秋
天上風雲真似夢人間歲月竟如流
可憐王粲依劉表不遇常何薦馬周
安得忘機共漁父白蘋洲上數沙鷗

見狻猊偶作

聖德彰戎服狻猊遠貢將雖然為異物費我大官羊

陸咸

一云辭
音溫厚

張

瑄

一首

瑄弘治中內官監太監鎮守廣西

平南烏江道中

山東平川小路斜不成村落兩三家分明橫幅桃源景
只欠溪流泛落花

傅

倫

一首

倫正德中都知監太監鎮守桂林

題望江亭

山色拂雲青溪光照空碧靜觀元化初超然意自適

王翺一首

翺字鵬起順天通州人嘉靖中選入司禮監讀書歷御馬監右監丞有禁砌蛩吟

詩話監丞集內鄉

李蔭于美序之

秋夜有懷

西風吹雨夜蕭蕭客思逢秋倍寂寥十載已虛明主詔
半生徒挿侍中貂誰憐季子黃金盡無奈馮唐白髮饒

何日一帆江左去獨尋山水混漁樵

張維二首

維字四維霸州人隆慶初選入伴讀東宮歷乾
清宮管事御馬監太監提督內忠勇營有蒼雪

齋豪

詩話張監丞以善詩稱定陵呼為秀才命掌兵
仗局駕幸局觀所造兵器手戲弄之奏曰兵凶
器非至尊所宜操帝笑而止嘗於禁中退食
地植竹數竿定陵題之曰蒼雪因以名其集

瑤臺霽望

天都五月雨一夜洗層臺日上芙蓉吐鐘鳴樓殿開石
根雲卷盡松頂鶴飛來看盡南巖景筠簟詎忍回

老姚詞

使節從天下崎嶇不計程野花微辨色山鳥未知名仙
姚鍼猶在真人語已成倚闌探舊跡何處步虛聲

孫隆一首

隆字東瀛三河人萬歷中以太監督織造駐杭

州

題慧因寺

笙歌日日娛西子為愛幽閒到玉岑舊有高人并西宅
沿流且向寺門尋

詩話寺在西湖南五代天成二年吳越武肅王
建面玉岑背兔嶺有箕泉流繞寺門元黃子久
曾築室
於是

明詩綜卷八十六

欽定四庫全書蒼要卷二萬五百六十

集部

明詩綜卷八十七

外臣

翰林院檢討朱彝尊編

吳徹一首

徹字文通崇仁人為陳友諒用事嘗偵太祖軍
被獲命詠百馬圖黔其面目為詭譎秀才又賦
西山夜雨詩云云

西山夜雨

莫厭西山夜雨多也應添起洞庭波東風肯與周郎便
直上金陵奏凱歌

周所立 一首

所立號盤谷臨江人仕陳友諒為草上梁文晚
就臨江教授

哭定位

綠錦池頭舊使君近傳消息不堪聞的盧竟死檀溪險
鸚鵡翻成鄂土墳蒿葉蕭條生夜月棠陰迢遞起秋雲

陳琳老大頭如雪無復軍前草檄文

靜志居詩話定位字子靜為陳友
諒守臨江抗太祖師於鄱陽被殺

饒介一首

介字介之臨川人元末自翰林應奉出僉江浙
廉訪司事張氏入吳杜門不出自號華蓋山樵
亦曰醉翁士誠慕其名自往造請承制以為淮
南行省參政吳亡俘至京師伏誅

詩話介之在吳延攬名士一時如陳庶子姜羽
儀宋仲溫高季迪楊孟載陳維寅維允虞勝伯

秦文仲皆與訂文自目為醉
然蓋仕於淮張非本懷也

丁未歲論書贈仲溫

太白流西荒音響一何切蒼精散暘谷光彩爛昭晰靈
氣垂八芒雲漢自茲扶人文既開張象畫亦區別冥機
不自見直待智者發誰能懷遂初心焉悟皇頡閉門工
造車出門即合轍古人有成言得之盡毫髮流形歸自
然萬古字不滅將同造化功豈獨在書訣神哉嶽瀆經
鍊石補天裂

馬玉麟二首

玉麟海陵人張士誠據吳為參政城破死

虎丘和范文正公韻

綠蕪迷四野空翠擁千巖風過鶴鳴樹雲歸龍在潭雨
花翻寶座積石護僧菴此地如容我移家住水南

又次柳道傳韻

高城落日下樹擁半山青野鳥啼還歇溪雲散復停微
官猶是客對此暫忘形為愛生公石移尊上小亭

張

憲

三十二首

憲字思廉紹興山陰人仕張士誠為樞密院都事吳平後變姓名走杭州寄食報國寺以死有

玉筍生集

顧俠君云思廉師事楊廉夫尤多懷古感時之作成化中安成劉鈺序其

集曰思廉與鐵崖諸君同為一時能言之士當元季擾攘志不獲伸才不克售傷時感物而洩其悲憤于詩可謂

思廉之知己也

詩話鐵崖諸弟子才鋒犀利莫過張思廉讀其長歌波瀾橫溢弟子不必不如師也元季居大都雙橋里有火主簿騎驢馬過之指示思廉曰能騎此否思廉笑曰虎則不能若馬也吾則能

之矣適翰林承旨任閤台從騎三十餘自西而東既過思廉執策就馬足甫及鐙則已奮迅馳突入翰林隊中羣馬辟易于烟塵中但聞翰林屬聲曰好馬南馳至雙橋越塹而過俯身就韁韁比及手已馳過樞密院街矣遂縱轡至哈達門而回主簿訝思廉久不返騎他馬來追于天師巷執手大笑竝轡歸欽漏下初鼓乃散鐵崖評其走馬歌云決非驢背詩人語洵足異也

琴操

茫茫禹迹兮畫為九州侯伯牧守兮職貢是修其或不臣兮天討罔偷胡令世兮敵國同舟嗚呼哀哉兮吾誰與謀

子夜吳聲歌

朱雀街頭雨烏衣巷口風飛來雙燕子不入景陽宮

估客行

二首

發舟石頭城繫舟梅根渚江月夜寥寥照見家人語
割裳製家書刺指題日月不知何時到但記今朝發

燭龍行

燭龍燭龍汝居陰山之陰大漠之野視為晝瞑為夜吸
為冬噓為夏蛇身人面髮如赭銜珠吐光照天下天地

寬日月小烏兔盤旋行不了窮陰極漠無昏曉汝代天
光補天眇汝乃不知日被黑子遮月為妖蠶食五緯無
精光萬象盡奪色下民媮熒皆昏惑燭龍燭龍代天職
胡不張爾鬣奮爾翼磨牙礪爪起圖南遍吐神光照南
極補缺免無損傷正畸烏不傾吳妖蠶黑子紛誅殛重
光重輪開萬國胡為藏頭縮尾窮陰北坐視乾坤黯然
黑乾坤若崩摧吾恐汝龍有神無處匿

夏蓋山石鼓謠

臨平石鼓不自鳴直待蜀桐魚作形陳倉石鼓載文字
徒有鼓形無鼓聲夏蓋之石或自鳴蓋石一鳴三吳兵
嗚呼三吳十年厭干櫓不緣夏蓋鳴石鼓

代魏徵田舍翁詞

有序

鐵崖楊先生以殺田舍翁為文皇根心語蓋徵
好直諫忤意者數矣是必有弗堪其直者故怒
曰會須殺此田舍翁不覺其言之出口也此則
是也然謂徵東宮臣節之虧故為太宗所薄而

呼為田舍翁者此則非也徵能入夢于太宗而不能自明其事故代田舍翁詞補綴諫錄云

臣本山東農臣誠田舍翁臣以隋末亂出仕蒲山公蒲山懷諫自用故臣言不用臣計不從百萬糧一日盡百萬衆一夕空力屈事去歸山東臣義不忍棄故土事仇充相隨西來朝真龍先帝不臣識大臣不臣通故臣上書自請安山東山東歸皇圖授臣洗馬之職在東宮東宮多不德兄弟不相容臣教太子翦黑閹親元戎又教

太子除陛下太子不臣庸太子既死先帝命臣聽陛下處分臣安敢效匹夫小諒自與逆黨同陛下以臣盡心所事赦臣死罪除臣秘書登臣政府爵位崇臣於是感激時時進諫開皇衷陛下幸而時聽臣言以致四海太平年穀豐使陛下功德及堯舜則臣心喜小有過失則臣心忤是以不四年中而有三代風陛下初年誠心聽諫故天耳聰今聽諫不逮昔故天耳聾往以未治為憂故人心悅今以既治為安故威德隆往日用臣言賜臣

以黃金甕天廡驄輟殿材構臣屋與墉今日以人言仆
臣墓碑傳臣子婚為惠胡不終喜臣則謂臣嫵媚惡臣
則詈臣田舍翁陛下不宜以喜怒毀譽損厥躬臣薦侯
與杜謂其才畧雄臣豈阿黨預知其終凶臣錄諫疏草
前後三百封欲使後世知陛下能聽諫致時雍豈欲賣
直歸過為已功避嫌焚草徒足恭臣幸而身先朝露使
臣不幸恐不免隨比干侶龍逢獨不記臣言良與忠胡
為乎會須殺此田舍翁田舍翁豈畏死但惜陛下既殺

張亮又誅劉洎翦刈大臣如刈蓬臣不願陛下祠少牢
立仆石但願陛下養氣質除內訌母以喜怒存諸胷大
臣無災帝德穹社稷無虞王業鴻千秋萬歲為唐宗老
臣不諱田舍翁於乎老臣不諱田舍翁

聖母神皇詞

東風未燥昭陵土感業尼稱天下母

則天

唐室山河忽變

周李氏兒郎更姓武洛水泱泱出寶圖黃金爛爛鑄天
樞五王不入迎仙院二豎能忘受命符君不見漢家元

后號文母廟食從來姪祀姑

餞梁王

壽春殿延喜樓梁王欲歸天子留樓前百戲俳優百
官陪宴酬未休梁王上馬樓上頭梁王東歸天子愁天
子愁梁王喜鵲泉暗移傳國璽碭山王氣隴璫起皇后
捧金卮天子歌柳枝家亡國破無多時

楊廉夫曰讀此
不覺涕泗橫流

恨不剗刃賊
臣以快其心

發白馬

朝發白馬津暮及陳留縣
兵事急星火驛程疾雷電
左挾弓右擎箭獨飛一騎
報軍書百里王城馳急變
丞相鎮靜材清談白羽扇
天子蔽九重張樂絳霄殿
內門三日不得朝咫尺天
威意徒戀三十萬衆解兵
降錦繡封疆成廣箭明日
腥風曠騎來背城借一誰
堪戰嬖倖竊魯弓姦諛齋
紀甌銜壁牽羊事已非東
手藩臣忘入援收淚踏邊
塵含悲別宮院回首東南
漢月高浙瀝風沙破顏面
白草黃雲望莫窮西樓尚
隔湯成淀木葉山前

下馬時青衣始悟降王賤使者來君不見

集賽行

集賽兒郎年十八手中弓箭無虛發
黃昏偷出齊化門大王莊前行劫奪
通州到城四十里飛馬歸來門未啓
平明立在白玉墀上直不曾違寸晷
兩廂巡警不敢疑留守親姪尚書兒
官軍但追上馬賊星夜又差都指揮
指揮宜少止不用移文捕新李賊魁
近在王城裏

夜坐吟

卷八十五
蜻蜓頭落鐙花黑瓦面寒蟾弄霜色玉壺水動漏聲乾
夜冷蓮籌三十刻蓬頭兒子凍磨墨欲拾羈懷尋不得
起看庭樹響風箏斗杓墮地天盤側

呂梁洪彭越廟

黃河東南奔呂梁屹相向蕭蕭彭王廟淒然據其上空
山貌秋色衰草蔚長望荒烟薄殘陽柔櫓破寒浪彭王
古壯士志節素豪宕徒成百戰功不獲寸土葬哀哉虎
兕軀竟作枯中醬可憐黃金甲采繪泥土像佇想忠壯

魂陰風幾悲悵憂來不忍去駐馬更悽愴

任城道中

客行魯橋道路出毒山驛驅車上峻坂歇馬道旁石雨
來松樹暗風起荷葉白一笑歎浮生胡為倦行役

冬夜聞雷有感

陽氣渙不收梨花開九月無何玄冬夜火靈飛列缺疾
雷放旬旬大雨久不輟頑雲聚不散淫風赤如血蟲豸
不入藏龍蛇競出穴寒威變融煥四序失故節胡為數

歲中雷向盛冬發委靡不執柄遂為羣陰竊及其不可
忍奮迅始一決乃於涸寒時礪碑未肯歇龍戰久不解
險難紛糾結既乖長養意愈使威權褻天怒不終朝王
綱有時裂何能堯吾君調理繼稷契先事誅權姦以次
及羣孽假爾霹靂車為吾左黃鉞普天新號令坐使萬
國悅煌煌世祖業中道復光烈

自臨安往富春過芝泥嶺示隨行李巡檢

平明升肩輿相與東西征浮嵐翳遠道宛在雲中行連

山互低昂曲折如送迎接天蔽喬木澗與風爭聲前登
芝泥嶺雨意漸覺晴曛曛日色薄蕭瑟衣裳輕畏塗見
鹿角高砮屯鄉兵綵旗病目眩嚴鼓羈魂驚憑軾若夢
寐撫觚傷浮生顧謂李飛尉我行猶幾程

臨安道中先寄賽景初

朝入臨安山莫上由拳嶺周道無行蹤晴空斷飛影嚴
關固高柵疊嶂列危屏荒坳斜日淡虛市野烟冷息肩
坐茂樹瞑目發深省何庸一作事馬蹄塵兵鋒迭馳騁

秋日山寨校兵呈同列

露下草木空四山秋色峻起持餓鵠弓習作長蛇陣旅
分貔虎徒翼若鷹隼奮文成牙既禡血祭鼓亦衅日光
耀旗影霜威肅兵刃翕張更坐作勇怯失退進徐如磨
蟻沿忽若奔馬迅向背月輪偃孤虛斗杓運渭原識諸
葛泚水見韓信雖非勅敵遇敢忘出門慎堂堂固其遏
整整孰敢近哀哀白骨堆纍纍黃金印縱無東可平豈
患西難鎮誰為人中雄往雪天下憤盡取羈縻域帖然

作州郡

主家貓

主家畜一貓文采玳瑁光晨餐溪魚飽午睡花陰涼營
營溝中鼠白日亢我牀鼠東貓却西所恨不相當一朝
忽相當反為鼠所戕淋漓兩脣紐跼促四足僵呼奴起
擊鼠鼠去貓倉惶作炊實貓腹割裳裹貓瘡愛貓心雖
仁敗事流毒長所媿主家閭貓鴛庸何傷

白頭母次徐孟岳韻

道菊哀哀白頭母西馬塍上花翁婦數莖短髮不勝簪
百結鶉衣常露股自言夫本業種樹一朝棄業從戎伍
荷戈南征竟不歸不知被殺還被鹵屈指十年音信斷
獨宿孤房誰共語家在錢唐古蕩東門前正壓官橋路
却憶夫在種花時春來桃李下成蹊自從夫死花樹折
錦繡園林成馬埒縱餘梨杏與梅茶無力入城供富家
富家遭兵亦銷歇金錢誰復收名花何況邇來新將相
一體好儉不好奢兵餘城市化村塢亂後名園作軍府

年年寒食杜鵑啼人家上冢西湖西時光荏苒易飄忽
可憐誰拾花翁骨君不見海棠風楊柳雨牢落錦紋箏
凋零金鴈柱黃四孃家客漸稀蛺蝶飛來過牆去

為隱師題林若拙畫

阿師堂上生雲霧突兀峰巒起縑素玄雲靉靆濕丹青
積翠爛斑落庭戶漲空嵐起湧波濤噴石寒光飛瀑布
鐘昏烟寺僧未歸澗跨板橋人不渡黃茅幾簇尖頭屋
綠林一帶無根樹茸茸碧蘚雨乍晴恰恰黃鸝春欲暮

新水桃花溪上舟閒亭芳草沙頭路意匠潛移造化機
筆端想有神靈助尚書在昔已擅場弟子如今稱獨步
抵須指畫索我題不惜長篇為君賦

贈鐫碑王生歌

太湖之水通吳淞綠波冷浸青芙蓉巨靈神斧斫不去
帝命留與歷代賢聖鐫奇功奇功曠世信希有至德乃
可齊不朽嗟哉王生習此藝功德不逢長袖手虞黃歐
揭牛毛多筆端佞語如懸河銀鈎鐵畫銜奇麗天下匠

石勞龍磨王生手握三寸鋼肥深瘦淺能自量神椎輕
重心應手白蝨食鐵森成行詞嚴筆勁逼晉漢學士何
人美詞翰宵亭五采護龜趺時立通衢人不看人不看
恐淚垂晉朝羊公今為誰高山深水苦自置後世誰人
想見之王生王生女當知功德豈在多文辭君不見延
陵季子碑上僅十字千載萬載生光輝

青山白雲圖

青山青青白雲白一尺小溪千里隔扁舟艤岸不見人

雞聲何處秦人宅桃花流水春粼粼不識人間有戰塵
待得紫芝如掌大歸來甘作太平民

荅問湖源風土

湖源源上路東與浦陽連地勝藏春塢民居小有天秋
山紅入畫晴野白浮烟一道桃花水如今泊戰船

聞說

聞說江城破歸心夢裏驚肺肝從此熟手足近來輕春
事愁花朵晨齋怯鼓聲平生慕王猛今日莫談兵

聽雪齋

萬籟入沉冥坐深牕戶明微于疎竹上時作碎瓊聲撲
紙春蟲亂爬沙夜蟹行素安政無寐欹枕漏三更

大都即事

二首

三月西山道春風平則門繡鞍紅叱撥羶帽黑昆侖衣
襖分香裏壺餅借火溫醉歸楊柳月綠霧掩黃昏
千步廊前月朦朧照御街風簷鳴寶鐸雷板耀金牌城
影平鋪地樓陰半上階誰家吹短調一夜亂春懷

投贈周元帥

玉帳臨江近金城鎮海遙鼓聲秋動地劒氣夜衝霄露
下星河白風高草木凋山寒旗獵獵沙靜馬蕭蕭左廣
初傳駕西船已畏燒五離纔散鼠六博又成梟豪傑乘
時奮賢材早見招紫樞虛上座黃闥待清朝會見擒姦
操歸來醉小喬恩波門外柳長拂富春潮

書憤

離宮金翠化為烟土宇凋零舊幅員豈是相君酣醉日

況逢天子中興年
武關兵馬全無信
浯水文章久未鐫
白髮詩翁憂帝室
長歌泣血拜啼鵑

画扇

渴龍飲清江
江水皆倒立
風雨滿山來
石楠半身濕

湖上

紅杏牆頭粉蝶綠
楊牕外黃鸝何處
春光最好蹋青人
在蘇隄

陳秀民

五首

秀民字庶子溫州人徙居嘉興仕張士誠為江
浙行中書省參知政事翰林學士有寄亭集

詩話庶子僑居于永永漢翔
纂稿李英華集以其詩壓卷

灤陽道中

晨出建德門暮宿居庸關風鳴何蕭蕭月出何團團短
轅駐空野悲笳生夕寒我本吳越人二年客幽燕幽燕
非我鄉而復適烏桓前登桑乾嶺西望太行山太行何
盤盤欲往愁險艱寓形天壤間忽如水上船役役何所

求吾將返林泉

送遠曲

誰令車有輪去年載客西入秦誰令馬有蹄今年載客
過遼西車輪雙馬蹄四念君獨行無近侍婦人由來不
下堂側身西望涕沾裳恨不化為雙玉璫終日和鳴在
君旁

至武岡

家居猶旅食兒子復南征婁縣千江隔都梁百日行鴈

書天外遠馬角夢中生食祿非吾願何時復舊耕

邳州

青山一髮見邳州落日雲迷故國愁父老空傳黃石在
仙人已伴赤松遊乾坤不信無清氣河水胡為尚濁流
野樹昏鴉棲未定數聲哀角起高樓

姑蘇竹枝詞

吳門二月柳如睂誰家女兒歌柳枝歌聲嫋嫋嬌無力
恰如楊柳好腰肢

劉仁本 二首

仁本字德玄天台人元進士歷官江浙省左右
司郎中佐方谷真謀議朱亮祖克温州被獲有
羽庭詩藁

續蘭亭會補參軍劉密詩

并序

庚子春仁本治師會稽之餘姚乃相龍泉之左
麓州署之後山得神禹祕圖之處水出巖罅潄
為方沼疏為流泉卉木叢茂行列紫薇間以竹

篁彷彿乎蘭亭景狀因作雩詠亭以表之合甌
越來會之士得四十二人同修禊事取晉人蘭
亭會圖詩缺不足者各占其次補四五言各一
首因曰續蘭亭會云

陽春沐膏澤草木生微暄靈圖發幽祕感此禹迹存衣
冠繼芳集臨流引清樽性情聊自適理亂復奚言

詩話左司結續蘭亭會與者四十二人今名氏
未能悉考詩僅存者左司而外都事謝理補晉
侍郎謝瑰鄉貢進士趙俶補參軍孔盛蕭山主
簿朱右補餘杭令謝滕帥府都事王霖補王獻

之蕭山教諭諸綱補府曹勞夷平江儒學正徐
昭文補府主簿后綿祕圖隱者鄭彛補山陰令
虞國嘉興路經歷張溥補鎮國大將軍掾卞迪
天台僧自悅補任城呂系四明僧如阜補任城
令呂本東山僧福報補彭城
曹諲詩皆醇雅絕類晉人云

再往三山

去歲才從上海還今年又復戴南冠
榕陰巷陌春風老荔子樓臺宿雨乾
幾處舊游重載酒十年往事一憑欄
回頭却羨天台道有客吹簫跨玉鸞

方行

三首

行字明敏黃巖人谷真子有東軒集

題吳彥嘉所藏張秋蟾龍圖

張公畫龍人不識筆法遠自僧繇得挂向高堂神鬼驚
恍惚電光來破壁想當渤海開筆力元氣淋漓浸無極
吞吐日月天地昏摩蕩雲雷太陰黑江翻石轉竅莫測
雪濤卷空銅柱側洞庭扶桑非爾誰顛倒滄溟為窟宅
乃知前圖只數尺坐令萬里起古色何當置我君山湖
上之高峰聽此老翁吹鐵笛

楊柳詞 二首

韶華無限暗中消
搖蕩春光幾萬條
却怪晚來風定後
雪花飛滿赤欄橋

曲江南陌亂垂烟
勾引春風入管絃
惆悵幾株憔悴盡
與人長繫別離船



明詩綜卷八十七

謹案卷八十七第九頁前二行集賽舊作怯薛今
改後倣此

--	--	--	--	--	--	--	--



總校官庶吉士

臣

張能照

校對官檢討

臣

蕭九成

謄錄監生

臣

李本

欽定四庫全書薈要

集部

明詩綜卷八十八

九

詳校官編修臣汪鏞



欽定四庫全書薈要卷二萬五百六十一集部

明詩綜卷八十八

羽士

翰林院檢討朱彝尊編

張宇初

八首

宇初字子璿廣信人嗣漢四十二代天師賜號

無為真人有峴泉集

王仲縉云峴泉詩冲邃幽遠篇章翰墨各極精妙

靜志居詩話古今詩僧傳者不少黃冠率寥寂無聞唐惟上官儀吳筠曹唐稍能詩然儀唐皆不終于黃冠則不得以黃冠目之矣惟元時道教特盛所稱丘劉譚馬郝王孫七真者大半有

集迄于至正如張雨伯雨馬臻志道是皆軼倫
之才明初僅張宇初余善二人無戾風雅已爾
餘皆卑卑鮮足當詩人之目此外龍虎山人張
留紳有詩見臨川胡珉大明鼓吹又黃徵君俞
邵編明史藝文志有徐和叔同亭詩悅一卷武
尼道士張蚩蚩適適吟一卷安仁沖虛山道士
顏服膺潛菴詠物詩六
卷訪之未得附載之

擬古

朝陽生東樹微月流西岑清泉活活流好鳥交交吟春
夏氣候殊涼燠自駮尋美人宗蘭佩芳香襲衣襟邈然
與世隔空睇瑤華音蹇修曷為言感慨投吾簪

養疾

濯足山澗中杖策暝乃還
寒蛩鳴疎樹落日下西山
灌園露已濕倦息衡門間
窶空非苦疾鶉衣畏早寒
寧貽榮叟謂齒落無衰顏

冬日還峴泉

郊墟物候和野迳抱溪曲
言旋白雲岑烟樹澹餘綠
淺瀨引寒流崇巒披秀木
荒疇已農獲隱構藏林屋
深窟想兔脫危機絕羝觸
毋為弓旌招靜言抱松菊

題夏山過雨圖

夕雨過涼樹流雲吐層峰橫橋蔓綠翳杖策宜丘中
頗得意俱滌邈然塵外蹤鍾山豈竟卧清瀨聞高淙

乙亥季夏還山居偶興

未夏熾餘暑幽期諧素衿川源蔽繁綠溪渚澄深潄
田舍靜雞犬荒蹊抱深林圓淵敞靈構疊嶂羅高岑
荷氣薄朝露魚波依重陰披襟遂恬息濯澗清閒心
遺世非塵傲養真宜自任秋風動早思寫我丘中琴

過錢塘

越上曾游地年深感寂寥山光隨浦盡海色共天遙古
刹藏秋樹寒江送暮潮故人渾不見愁緒酒難消

望吳山

吳越游程熟溪平驛路分夕陽回浦樹秋色滿湖雲曲
渚船孤放淒風鴈獨聞浣花茅屋小別思夢紛紛

山行晚眺

縱目郊原趣依稀物候新溪寒回返照林暝促歸人山

逕松陰雪漁家柳色春盡拋江海興期此坐垂綸

余善四首

善字復初玉峰清真觀道士

楊廉夫云方外生余善追和張外史

游仙詩讀至長桑樹爛金雞死有客逸跡三叫以為老鐵喉中語又如一壺天地小於瓜雖老

鐵無以

著筆矣

追和張外史游仙詩

城闕芙蓉曉未分身騎金虎謁元君青童不道天家近
笑指空中五色雲

溪頭流水飯胡麻
曾折瑤林第一花
欲識道人藏密處
一壺天地小於瓜

不到麟洲五百年
歸來風日尚依然
穉龍化作雪衣女
來問東華古玉篇

春宴瑤池日景高
烏紗巾上插仙桃
長桑樹爛金雞死
一笑黃塵變海濤

席應珍

一首

應珍字心齋號子陽子
常熟人提舉致道觀

題章復画碧桃

憶昔瑤池侍宴時
碧桃花下酒盈卮
今朝醉裏看圖画
羞對東風兩鬢絲

鄧羽一首

羽南海人明初知青陽縣事後為道士隱居武當之南巖自號松石道人不知所終有觀物吟絕句

人生天地長如客
何獨鄉關定是家
爭似山翁隨所寓

年年處處看梅花

盧大雅 一首

大雅貴溪人龍虎山道士有石缸樵唱

顧玄言云大雅

為張外史所知定非庸人

舟中寄散木張外史

櫂郎催踏春溪舫阻我辭君散木亭江水未應春去漲
鄉山偏向別時青烟波釣艇新衝雨河漢仙查舊犯星
輪與仙都吉居士一簾山雨聽鵝經

周思得一首

思得字養真別字素菴錢塘人有弘道集

俞汝成云

真人扈從成祖北征思寵甚厚歷事五朝晉秩二品享年九十諭葬賜塋亦古今所希觀者

顧玄言云養真羽流高逸被文皇之眷游仙諸詩殊有思致

夢游仙詩

翩翩鶴羽拂重雲仙樂嘈嘈世未聞
一虎借騎何處去定應月下訪茅君

林復真

一首

復真字剛伯常熟人入龍虎山為道士預修永樂大典歸居致道觀之來雲堂有止菴集

送東白副綱還雲間

三年客裏惜居諸此日功成貝葉書
幾度賜衣沾湛露滿懷歸興載籃輿
山橫齊魯吟情好月落秦淮鴈影疎
若過吳門煩問訊故園松竹近何如

章志宗一首

志宗字清源號逍遙子松溪文昌觀道士有逍

遙集

閒述

天無一片雲萬里清如水孤月自空明我心亦如此

錢月齡二首

月齡字鶴山無錫人居洞虛宮有丹丘漫橐

汝俞

成云鶴山吳越王鏐二十一世孫吟亦成章
顧玄言云道人詩如盆涵魚藻小有幽致

花前

有酒當醉花前人莫教啼鳥傷殘春流光轉盼赴壑水

好花回首飛成塵請看自古緜華地年年惟見蓬蒿新
訪僧田舍

出郭尋僧舍青山隔水田扁舟孤墅入紅樹碧溪連菰
米炊香積茅茨帶夕烟相留無限意我亦愛逃禪

吳隱玄 一首

隱玄自號琴樂翁南昌鐵柱宮道士

漁父詞

扁舟一葉蘆花外短笛數聲楊柳陰隔浦樓高看不見

夜分何處得相尋

周休休 一首

休休正德間居建昌隆道觀

題院壁

陌上紅塵撲面飛
近來覺得世情微
白雲深處招黃鶴
不識人間有是非

汪麗陽 一首

麗陽鉛山人嘉靖初武夷接筍峰道士遺蛻葬

于石壁有野懷散藁

荅葉東林

柴扉終日對雲關
何事游人興未闌
一榻枕泉眠竹影
茶烟初歇鶴聲殘

林運素

一首

運素南都道士

登天壇

我覽圖經尋岳瀆
東至太行入王屋
崎嶇千里不敢辭

手策桃枝九節竹舉頭貪看華蓋峰
驀然身入翠微谷上方樓閣與雲齊
金碧交光射林麓探竒直度瘦龍脊
千仞斷厓橫獨木虛皇之觀紫金堂
絕勝洞天三十六日精月華左右分
黛色參天如削玉厓下飛流太乙泉
自是天關通地軸巡山使者持赤刀
咫尺蛟宮誰敢黷或聞仙犬吠仙燈
或睹仙人跨仙鹿林泉處處愜予心
摒擋琴書將卜築藥櫃麻籠春復春
蟠桃畢竟何年熟

吳孺子

三首

孺子字少君金華人嘉隆間以黃冠游吳楚間

有吳少君集

鄒彥吉云山人雅好杜詩而其詩不專學杜外枯中腴韻短意長詩

不多作一歲不過

二三十篇而已

詩話少君周游吳楚間留稿李獨久性至巧工
于製器一瓢精絕過荆溪為盜所擊王元美為
作破瓢歌嘗煉白堊為竈名玉雪厨以白米置
冬春園中令微黃號檀香米一杖用綠萼枝條
為之名紫玉杖最愛青苔天新雨輒尋牆陰階
面得一苔博必詫人對客言每稱荀卿性惡之
說詩六卷沈嘉則趙汝師為作序鄒彥吉為作
墓銘余仲房王伯穀為作傳姚叔祥為述遺事
均未嘗言其為道士獨顧玄
言韓國雅目為黃冠今從之

呂家曲水寄別錢懋穀

曲抱孤邨水長流斷岸陰借居方避地言別又沾襟客
久衰偏易鄉遙恨轉深把君書在手侵曉到如今

倚杖

貧病吾將老江湖度歲華艱難惟有淚飄泊更無家倚
杖慚歸鳥臨池惜落花秋風何太早瑟瑟向蒹葭

欲製羽衣

野服前年製羽衣今日無忽見白鷺鷥遠在青草湖

徐淵二首

淵字湛虛一字月汀又字秋沙海鹽人萬歷中

棲真觀道士

一作文始道院

有水月軒橐

舟中

遠水浮高漢扁舟載夕暉人家隨岸斷沙鳥背帆飛
旅況消村酒新寒戀布衣片雲何處起先我向南歸

書竹溪僧扇

寒玉千竿水一溪風光絕勝灑東西山僧定起不知午

滿地綠陰沙鳥啼

明詩綜卷八十八